



Sesida dals

Communitgà ils

Protocol nr.

25 d'october 2022

28 d'october 2022

810/2022

Incumbensa Hohl

concernent distgargias fiscalas per famiglias e per personas spezialisadas

Resposta da la Regenza

Cun l'incumbensa Hohl dals 3 da settember 2022 duai la Regenza vegnir incumbensada da suttametter al Cussegl grond in project concret per distgargiar fiscalmain famiglias e personas spezialisadas (potenzialas), cun l'intent da meglierar l'attractivitat per las gruppas en mira respectivas en la cumparegliaziun naziunala ed internaziunala. Las sutsegnadras ed ils sutsegnaders pretendan per exempel d'examinar las deducziuns per uffants, las deducziuns dals custs per la tgira d'uffants tras terzas personas sco er las deducziuns per pèrs cun duas pajas. Plinavant proponan ellas ed els d'analisar criticamain la concepziun da la progressiun fiscala en vista als pèrs da la classa mesauna cun duas pajas. Areguard las personas spezialisadas pretendan ellas ed els ultra da quai che l'imposiziun da la taglia a la funtauna vegnia integrada en l'examinaziun.

La Regenza sustegna il giavisch da meglierar vinavant l'attractivitat dal chantun Grischun per famiglias e per personas spezialisadas tenor questa incumbensa. Resguardond il dretg surordinà ed ils svilups da la politica fiscala (p.ex. la taxaziun individuala) è ella perquai pronta d'examinar – en il senn da l'incumbensa – las propostas sco er las deducziuns numnadas, cuntegnidas en spezial en l'art. 36 (deducziuns generalas) ed en l'art. 38 (deducziuns socialas) da la Lescha da taglia per il chantun Grischun (DG 720.000). Plinavant è ella pronta da far in'analisa da la situaziun sco er da preschentar in project concret. En quest connex tegna la Regenza quint da las circumstanzas menziunadas qua sutvart.

Durant la perioda da legislatura currenta 2019–2022 èn gia vegnidas decididas e realisadas distgargias fiscalas considerablas, e quai er per las personas natirals. Cun elavurar e cun realisar mesiras concretas sto plinavant vegnir resguardà il basegn d'agir areguard la grevezza fiscala interchantunala, ed er tegnì quint dal fatg che la libertad d'agir è limitada sin plaun fiscal. Reducziuns generalas da la taglia per tut ils pajataglias n'èn actualmain betg inditgadas. Las pussaivladads finanzialas en il

sectur fiscal han clers cunfins. La situaziun da partenza cun gronds surplis dal retgav durant ils ultims onns e cun la situaziun finanziaria solida actuala po bain vegnir designada sco buna. Ins sto dentant er resguardar las ultimas perspectivas finanzialas cun reducziuns massivas dal retgav e cun grondas malsegirezzas.

Tegnair quint ston ins qua cunzunt dal pegiurament considerabel da las cifras dal plan da finanzas. Il nov plan da finanzas 2024–2026 cuntegna deficits che s'augmentan fermamain, e quai sin in nivel da 65 fin 112 milliuns francs. Ils motivs principals èn las perspectivas da gudogn fitg pessimisticas da la Banca naziunala svizra (BNS) sco er il fatg ch'il retgav da la gulivaziun da resursas naziunala vegn a sa reducir massivamain a partir da l'onn 2024. Il preventiv 2023 ed il plan da finanzas 2024–2026 quintan cun ina distribuziun quadrupla dal gudogn da la BNS e cun ina cumpart chantunala da 62 milliuns francs. Sco quai che las perditas enormas da la BNS durant ils emprims trais quartals da l'onn 2022 han mussà, èsi bain pussaivel che las distribuziuns dal gudogn scrodan dal tuttafatg ils proxims onns. Tenor las ultimas prognosas da l'institut BAK Economics SA è plinavant la perdita tar la gulivaziun da resursas naziunala bler pli gronda che prognostitgà fin ussa. Da furmar ina reserva da cumpensaziun da durada limitada vegni perquai desisti previsiblamain. Ils ultims scenaris da la politica da finanzas per il plan da finanzas 2024–2026 mussan che las perspectivas finanzialas cuntegnan malsegirezzas relativamain grondas. Ils eveniments actuals (crisa d'energia, guerra en l'Ucraina ed inflaziun pussaivla pli gronda) augmentan supplementarmain las malsegirezzas areguard la planisaziun. L'attractivitat dal chantun Grischun sco er la cumpatibilitad da la famiglia cun l'activitad da gudogn vegnan ultra da quai meglieradas er tras autras mesiras, p.ex. cun promover pli fitg la tgira d'uffants complementara a la famiglia. Las mesiras fiscalas ston vegnir coordinadas cun talas, e las finanzas chantunalas ston pudair vegnir tegnidas en l'equiliber. Il medem vala er per las vischnancas (e per las Baselijs chantunalas). Lur entradas fiscalas vegnissan medemamain tangadas tras la distgargia fiscal.

Sa basond sin questas explicaziuns propona la Regenza al Cussegl grond d'acceptar questa incumbensa.



Namens der Regierung

Der Präsident:

Marcus Caduff

Der Kanzleidirektor:

Daniel Spadin